

山西通志卷第五十七

山西巡撫都察院右副都御史臣覺羅石麟奉

旨修輯

古蹟

自漢後上黨記三晉錄諸書暨唐後李用德羊角山記林
須霍山記王向弼龍門記諸書元明胥不傳而古蹟之存
者尠矣今就其見於載籍而不甚穿鑿傳會者錄之他若
委巷相傳之說沿習已久亦間採焉志古蹟

太原府

陽曲縣

三交城西北十五里晉大夫竇鳴犢城也址存宋陸游老學
菴筆記太平興國四年平太原降爲并州廢舊城徙州於

榆次今太原又非榆次乃三交城也在舊城東北三十里
本名故軍又嘗爲唐明鎮

大孟城東北八十里晉祁氏邑後分爲七大孟其一也漢爲
縣後魏曰大祁城

狼孟城北六十里漢地理志太原有狼孟縣莽曰狼調舊斷
澗爲城今名黃頭寨綱目秦伐趙取狼孟番吾遇李牧而
還集覽狼孟縣名屬太原郡故城在陽曲縣

汾陽城西七十里漢爲汾陽縣顏師古注隋文帝自以姓楊
故惡陽曲之號改爲陽直唐復舊名綱目撫實隋改縣曰
陽直又徙治汾陽故城改曰汾陽唐於故陽曲城置汾陽
縣尋改今名

洛陰城東北六十里北魏地形志陽曲有羅陰城隋洛陰府

之地又名洛陰縣唐初名羅陰縣後省今名羅陰村有
壽中修寺碑驃騎將軍王整所立

木井城東北七十里鄭村南社卽故汾陽縣也又名故縣城
古角城在貢院供給所左

古城西北七里蹟存

蔚州僑郡舊唐書地理志武德六年置蔚州寄治并州陽曲
縣仍置靈邱飛狐二縣

燕然故縣唐貞觀六年以蘇農部落置燕然縣隸順州八年
僑治陽曲十七年省

陽曲故縣城東六十五里石城都舊唐志武德七年省陽直
縣改汾陽爲陽曲縣仍移治陽直廢縣

故孟縣隋志分陽直縣置大業初廢

晉文公廟故址宋陸游筆記唐明鎮有晉文公廟甚盛平太原後潘美奏乞爲并州從之以廟址爲州治

陽曲川北三十里北齊神武帝建牙於此隋地理志有陽曲澤

唐監牧唐置以牧馬

造墨場金地理志太原府有造墨場

石室北魏風土記太原郡山有石室方丈四壁文字篆書人尠能識

楊廣道西北六十里天門關東北崖隋煬帝爲晉王時所開道因名

狄梁公故里今狄村慈觀寺有碑記

柏堂舊府城內唐北平王馬燧建

寇庄南六里相傳宋相寇萊公別墅今官場花園土地廟遺址尚存

柳溪西一里汾堤之東宋天禧中陳堯佐知并州因汾水屢漲爲築堤周五里引汾水注之旁植柳萬株中有秋華堂堂後通芙蓉洲堤上有彤霞閣每歲上巳太守泛舟郡人遊觀焉久圯於水斷碑尚存按彤霞閣陳堯佐建秋華堂宋韓絳韓縝相繼守太原時建李清臣作碑記又有四照亭水心亭

雁邱元遺山雁邱辭序泰和乙丑遺山赴試并州道逢捕雁者捕得二雁一死一脫網去其脫網者空中盤旋哀鳴良久亦投地死遺山遂以金贖二雁瘞汾水傍壘石爲識號曰雁邱因賦此詞同行蒲溪楊正卿果樂城李仁卿冶和

山西通志 卷三十一 三
之詞注雁邱在今太原府陽曲縣事見輿圖備考

籌邊樓府治內宋端明殿學士馮京守太原時建

愛月亭府治東宋馮京守太原時建

安武堂縣治西下臨汾河宋時春秋仲月閱武於此

良宴亭府城東宋時建以宴客

西景園明晉藩園在廢府西北隅

西園明靖安王園

桂子園城東南隅布政王道行別業有桂數株日觴咏其間

有桂子園集行世後爲明宗藩河東王所得更名金粟園

爲梵宇俗名小五臺

雄風樓明寧河王建王明甫有詩

作霖樓都察院後

唱經樓布政司前

坤德閣橋頭街觀音堂前

顯靈閣大盈倉內

浩然臺在東關延壽寺後上有楊宗氣王好問詩

鎮河樓舊在水西關真武廟後有樓二楹相傳樓下有鐵牛

二

鎮鐵坑旗纛廟東相傳掘地則鐵陷明初焦駙馬都尉嘗製刀甚利後置旗纛廟內風雨爲災復入坑

冰窖舊在開平王廟後巡撫李某創建蓋遵周禮之制節宣陰陽也今移晉廢府

古漆井小彌陀寺西相傳未有寺先有井內無甃痕故名

石家茆峭壁一崖汾水環流地廣四十畝俗傳王將軍避兵

地有早種晚收遺種

試斧石天門關凌井溝內類斧劈痕上有楊美益詩

丹井晉廢府東城門內味極清冽府有藥名金棗丹治疾甚驗惟用此水

辟蠅木在烈石廟殿神龕內色類沉香相傳辟蠅

寶賢堂石刻舊在晉府今移入三立祠明晉世子奇源集古法帖序云取淳化諸帖竝我朝以書名者十數家擇其尤者摹勒上石釐爲十二卷戴令夢熊跋石經亂不全

國朝順治間郡守宗得於斷壁頽垣者二十餘塊余訪求藏本舊揭鈎勒上石計補五十餘塊而全帖以完

宋太宗書庫碑在壽寧教寺大中祥符四年真宗御書勒石宋并州新修廟學碑至和元年知并州魏國公韓琦建廟撰

記

金府學廟碑 明昌二年翰林修撰趙渢撰記云天會九年耶律公資讓建正隆初完顏宗憲繕完大定丙午亞尹張公子衍漕貳楊公伯元立建賢堂於兩廡間明昌二年張公大節尹太原撤故就新規模大備

金英濟侯感應碑 烈石祠前大定二年縣令史純撰文

元英濟侯碑 至正中翼寧牧搭海帖木兒樹碑

大古碑 崇善寺西井樓南高丈許廣七尺螭首五尺今臥土中

透玲碑 在烈石廟光瑩照人俗名透玲

太原縣

晉陽城 縣治北里許故唐國也周封叔虞曰唐至子燮父以

有晉水更號晉一名唐城智伯引水灌之不浸者三版晉刺史劉琨展築中有三城一曰大明城董安于築北齊置大明宮其一東魏靜帝置晉陽宮隋更名新城其一開皇十六年築名倉城又汾河東岸曰東城貞觀十一年長史李勣築德宗時引晉水架汾潞爲東隍省守埤萬人又醴汾水環城植柳固堤建中四年節度馬燧亦引晉水架汾至城東爲池武后時長史崔神慶以二城隔汾乃於其間跨水聯堞合而一之名曰中城宋太祖御城受劉繼元降始隳其城又西堞外有羅城以禦西山之水俗名長龍城其近有羅城鎮按晉陽唐爲北都有留守宋太平興國四年平太原議者謂宋興歸德爲商星分野太原參星分野昔高辛氏二子不相能故自古參商不相見國家盛則後

服則先叛不宜列以方鎮乃下詔毀其城改爲平晉縣
以榆次爲并州徙太原民於唐明鎮縱火焚太原廬舍老
幼趨城門不及焚死者甚衆金元好問過晉陽故城詩曰
汾流決入大夏門府治移著唐明村又曰東闕蒼龍西白
虎金雀觚稜上雲雨不論民居與官府仙佛所廬餘百所
鬼役天財千萬古爭教一炬成焦土又曰萬夫畚插開連
岡官街十字改丁字

唐城晉陽縣北二里都城記堯所築

二陵城北魏志太原郡長安縣有二陵城

三角城西北二十里義井村一名徒人城又名胡提城趙襄
子所築以處刑徒內置卻敵外安龍尾爲三面故名三角
城址存北魏志太原郡長安縣有三角城

平晉故城東北二十里高一丈三尺周四里餘內有故碑字多剝落宋置永利監於此

王陵城汾水東舊縣東北鄭村今名黃陵村

長安故縣北魏志泰常二年置真君中省景明初復

龍山故縣隋志後齊置大業十年改爲晉陽

陽真故縣隋志開皇十年置大業初省入太原

潛邱爾雅晉有潛邱在太原縣東南八里舊城內長四千三百三十一步廣三千一百二十二步周萬五千一百五十三步高四丈相傳宋修惠明寺浮圖陶土爲瓦用唐地理志都城左汾右晉潛邱在中

臺駘澤南十里晉水下流漚爲澤廣二十里今爲汾水所沒盡爲民田旁有昌寧公廟卽臺駘神

晉祠西南懸麓山麓晉水發源處魏地形志晉陽有晉王祠
昔智伯遏水灌晉陽後人因之蓄爲池沼建祠水側結飛
梁於池上北齊天保中大興營建遂爲北都北史後主天
統五年改爲大崇皇寺唐高祖舉義師禱於此太宗親製
碑文仍名晉祠晉天福六年封興安王宋天聖間改封汾
東王又建女郎祠於水源之西元至元間重修汝陽弋穀
撰記云祠西山上有望川亭祠中兩泉北曰善利南曰難
老皆作亭蔽之祠南大池西岸有流盃池池上曰均福堂
堂後曰仁智軒其南曰湧雪亭池中島上曰清華堂亭曰
環翠邦人歲時行樂者甚衆明改稱唐叔虞祠嘉靖天啓
間俱重修有碑記

晉陽宮故唐城內春秋時董安于理晉陽公宮卽此東魏武

定三年高歡言并州軍器所聚動須女功請置宮以處配
沒之口於是置晉陽宮齊天保中置大明宮宮內建宣光
建始嘉福仁壽宣德崇德大明七殿德陽萬壽二堂北有
元德門又北有元武樓樓下有門通城外隋唐踵麗增華
址微存唐地理志晉陽宮在都之西北宮城周二千五百
二十步崇四丈八尺都城左汾右晉五朝志太原有晉陽
宮

大明宮北齊書天統初世祖在晉陽旣居舊殿少主未有別
所詔給事黃門侍郎馮子琮監造大明宮宮成世祖親自
巡幸怪其不甚宏麗子琮對曰至尊幼年纂承大業欲令
敦行節儉以示萬邦兼此北連天闕不宜過復崇峻世祖

賜善

德陽堂北齊建

宣德殿北齊建

大明殿齊後主以晉陽大明殿成大赦文武百官進二級免并州太原一郡來年租

崇德殿北齊建

內殿天保元年冬十月帝御金輅入晉陽宮朝皇太后於內殿

南宮齊大寧元年冬十一月武成帝卽位於南宮

十二院後主於晉陽起十二院壯麗踰鄴下

五龍門武平七年後主夜斬五龍門而出

清華堂西南十里晉祠池上北齊天保中建

避暑宮西南三十里北齊神武帝避暑處俗稱皇家宅明周

文端經題天龍洞詩齊主宮存避暑基縣志避暑宮有二
一在蒙山上世傳劉薛王避暑寨一在天龍山東址存又
葦谷山有避暑宮齊天保二年建後賜名仙巖寺

寶墨堂在晉祠齊天保中建

栢堂文宣帝避暑宮

雙堂在東城北魏太原公高洋第

號令堂汾水東舊晉陽縣唐高祖誓義師於此

起義堂唐地理志宮城東有起義堂張燕公作頌

受瑞壇唐高祖舉義兵使子元吉留守獲瑞石有文曰李淵

萬吉因築壇祀以少牢唐地理志倉城中有受瑞壇

戰陽樓貞元十一年太原監軍王定遠謀殺節度使李自良

不克走登乾陽樓夜墜城逸

飛閣唐地理志西北十五里有飛閣顯慶五年築

武臺縣西北唐顯慶間築

勤政閣十國春秋北漢少主劉繼恩寢處居勤政閣

資聖院統平殿宋皇祐五年奉安太宗御容於此禮志太宗取劉繼元於并州是太平之統也卽崇聖寺殿名曰統平以奉太宗嘉祐元年統平殿災諫官范鎮言并州素無火災自建神御殿未幾而輒焚天意若曰祖宗御容非郡國所宜奉安者近聞下并州復加崇建是徒事土木重困民力非所以答天意也自并州平七十七年故城父老不入新城宜寬其賦輸緩其徭役以除其患使河東之民不忘太宗之德則陛下孝思豈特建一神御殿比哉

上黨坊齊文宣帝將受禪時訛言上黨出聖人帝聞之將徙